

蒼

清

叢

俞樾纂

編

第五冊

進步書局校印

會最編卷十五

清 曲園居士纂

周夫人

前明周忠武公遇吉之忠勇。世多知之。乃其妻亦奇女子也。世則未有知者。山東李
織齋煥章有周夫人傳。今錄於此。云周夫人者。山西總兵左都督忠烈公周遇吉元
配也。將家子。貌美麗姣好。纖小盈盈。有異力。善騎射。挽弓數百石。讀兵家言。傳李衛
公兵法。屢佐忠烈公立奇功。崇禎末。從忠烈公竄武帥幕中。李自成西入潼關。據西
安。稱大順王。僭號永昌。夫人謂忠烈公曰。明年寇必渡河。將軍當奏之朝。統兵禦之
河上。天下事猶可為也。忠烈公是之。不果行。明年正月。寇分四將軍。兵出河懷蒲津。
自分兵四十萬。由西安東收諸塞上兵。趨宣府居庸。犯京師。是時忠烈公在雁門。聞
諸鎮路將皆降。乃擇標兵三千人。屯寧武。寇至。忠烈公迎之。戰三大敗之。俘斬數千
計。自成驅榆林甯夏兵。共攻忠烈公。又大敗之。追戰陷重圍中。奮力格鬪。俘斬愈多。
日暮。寇已退。馬中流矢。忽蹶。忠烈公拔佩刀自殺。夫人貴重鎧。持雙矛。三陷陣。入中
堅。折其牙旗。斬最驍將。寇大崩壞。莫敢當。自成至日暮。又合圍。夫人潰圍出。標下健

兒盡矣。夫人怒，自輓聞提其賊前隊將而舞，寇披靡，自成大驚，遽去。陣潰，亂夫人乘亂攻之，所擊殺近萬。忽聞傳云：忠烈公已就斃。夫人大呼曰：「天乎！天乎！將軍死，戰何為耶？」亦自殺。時有一將軍最勇，亦死軍中。史氏並軼之。余來趙城，學博文武公。君子不妄語人也。為予言其本末，為之傳。附忠烈公傳後。見李煥章文集

曲園居士曰：按明史周遇吉傳，夫人劉氏素勇健，率婦女數十人據山巔公廨，登屋而射。每一矢斃一賊，賊不敢逼，縱火焚之，闔家盡死。是公之夫人為劉氏，其勇健誠有之。如此傳，則并能持矛陷陣，力戰捐軀，凜然烈丈夫矣。錄之，亦可補史傳之遺。周遇吉諡忠武，此云忠烈，何歟。

沈雲英

沈雲英，浙江蕭山人，居長巷里中。父至緒，崇禎辛未武進士，為道州守備。雲英性聰慧，工書，旁涉經史。癸未，張獻忠破武昌，入湖南，湖南郡縣皆靡。惟道州以至緒力戰得全。既而再與戰，馬驚仆，墮於陣。雲英聞父變，奮呼持矛，趨賊壘，奪父屍還。賊環糊之。雲英左右支格，賊莫能傷。完守入保，而道州終不可破。湖撫王聚奎疏聞，烈帝詔贈至緒昭武將軍，而授雲英游擊將軍。仍代父為守備。守道州。雲英所適四川人賈

萬策為荊州督師營中軍。分守南門。城陷。不屈死。雲英聞夫變。慟哭辭職去。開闢數千里。出入賊壘。扶柩歸蕭山。遂隱居。教授里中。兼以書法訓後學。族子北陽。受春秋胡傳。為知名士。卒年三十八。觀文汪啓集

畢著

歙縣畢氏女。名著。字韜文。亦國初人。布衣王聖開之妻也。年二十。隨父宦薊邱。父與流賊戰死。屍為賊所得。著身率精銳劫賊營。手刃其渠。眾潰。輿父屍還葬金陵之龍潭。夫婦偕隱以終。有紀事詩云。吾父矢報國。戰死於薊邱。父馬為賊乘。父屍為賊收。父讐不能報。有媿秦女休。乘賊不及防。夜進千貔貅。殺賊血漉漉。手握仇人頭。賊眾自相殺。屍橫滿坑溝。父屍輿歸。薄葬荒山陬。相期智勇士。慨然賊同仇。蛾賊一掃盡。國家固金甌。又有村居詩云。席門閒傍水之涯。夫壻安貧不在家。明日斷炊何暇問。且攜鴉嘴種梅花。見國朝問正始集

曲園居士曰。畢著事與沈雲英相類。故並錄之。正始集中又載許夫人。奉天鐵嶺人。鎮平將軍一等男徐都治。謚襄毅公之妻也。精韜鈴。善騎射。偕襄毅公出兵。每自結一隊。相為犄角。康熙十三年。吳三桂犯湖南。襄毅往援彝陵。夫人駐防江口。

十五年鎮將楊來嘉叛夫人脫簪珥犒師沿江勦殺屢卻之八月倖犯鎮署夫人中礮歿將軍蔡毓榮等以聞特旨優卹予雲騎尉世職以次子永年襲何國初奇女子之多也朝廷一例哀榮以命婦而從陣亡恩例賞延於世亦非常曠典也而其時之師武臣力即可於斯徵之矣

王秀女

烈女王氏名秀女開封浚儀人王碧少女也年十七許字于之瑞子天祥未幾天祥死父母匿不以聞將期密議改適烈女始知之匍匐奔喪父母不能止遂與偕往是日為天祥小祥烈女出向所受聘陳之靈几躃踊絕粒者二日父母促之歸烈女願留事舅姑之瑞令妻與女伺其臥起踰年瑞女適人姑獨與烈女居烈女聞天祥幼育於陽武王姓己為娶妻生子輟妻死遺孤就哺外戚烈女思自撫之為于氏宗祧計王堅不與烈女益失望適天祥大祥烈女哭祭不食終日姑倦寢烈女夜起自經是夕有大星隕於家黑白二氣自屋角出久之乃滅警夜者怪之及曉烈女死顏色皎然如生初之瑞有刈麥刀二其一忽失去至是從烈女枕下得之益信其死志非

一日矣

見毛際可安序堂文鈔

廖氏

廖氏者河南開封府某縣人流寓東南嫁沈大誼美容儀工挾彈走馬及鞞韞蹴鞠高絕諸技所至人遮道觀嘗至烏程道上羣少年方逐射顧見紙鳶一人出錦織成約曰即中與若錦不中罰如直於是少年皆不中廖氏行而前曰妾請為君彈之一發而得載其錦以去後十年移家嘉興值歲大旱村人多絕食廖氏為給一月糜賴以全者數家亡何大誼死慨然曰吾少之所為長而悔焉所為浮沉者壻非此不活也今壻死甯復為辱人賤行哉遂著比丘服邀其鄰一老嫗俱入皐亭山結茅屋惡衣糲食焚香誦佛見者不能狎也山有猛虎常殺人過其門率馴擾而去山中人益異之

見李良年秋
錦山房集

李孝貞

李孝貞名鳳秀州李夢康女也事父終身不嫁夢康士而貧夕不再炊女織紵以佐尸饗吟誦與杼聲相間也父疾禱於天有烏銜果蘇墮藥臼中嘗而進之脫然愈里中世族爭束帛僂皮徵孝貞孝貞益不自安一日請於父曰女孰賢佯曰善事舅姑耳女曰休矣焉有舍我父事他人親以為賢乎竟不可奪閨巷聞而化之諸婦女有

爭言話詳相恐嚇。戒勿令孝貞知。時復為之語曰。生女慎勿嗔。養父不嫁有孝貞。孝貞何私謚也。先父死年四十七。見丁憲文集

林氏雙烈

林氏在太平為望族。孝廉君楚唯之長子有茂。娶同邑崔氏女。甫二載而茂卒。崔以娠故未殉。子生而殤。崔於是仰天長歎曰。吾所以忍死待者。為未亡人植遺腹耳。今已矣。吾何求哉。盡出其奩中資以奉姑。以分妯娌。給奴婢。初取鉛粉咽之。弗死。吞金簪。又弗死。俟家人防稍懈。投繯而死。孝廉君有女。字石埭。方生未歸。聞方生病篤。女減食輟膏沐。若欲與同生死者。比卒。家人匿其訃音。女疑之。宛轉詰侍兒。乃得實。即哀請往奠。弗許。哭三晝夜。不絕聲。水漿不入口。孝廉不得已。與期曰。奠畢即返。依舅姑。不若依父母便。女唯唯。於是輿送方生墓所。哭奠如禮。歸拜舅姑畢。乃引鏡自刺其面。涅守志。二遣輿迎。不肯返。曰。凶服在身。不敢侍父母側。迨明年。翁復殤。姑李氏自刎以殉。人意此時女必死。女泣曰。兩叔妯娌。伯舅姑老。我死誰為翁姑殯者。於是凡附棺之具。纖悉治具。無不至。越十日。命侍女具湯以沐。湯至。給侍者出。而雉經於寢矣。任繩隗為作太平雙烈傳。見任繩隗直木齋集

張氏五烈

甯晉張來鳳兄弟。以詩書世其家者也。戊寅冬。聞賊陷甯。來鳳之母李。率其妻劉暨弟起鳳妻霍。附鳳妻章。從弟嘉猷妻王。死之初。賊薄城下。勢且殆。諸婦謀諸母。母曰。吾輩婦子。有死無二。相與亡匿文廟中。見古井泓然。指而歎曰。吾一家得死所矣。我先之。若等從而後。諸婦請曰。婦輩年盡少。不死即壽。姑老矣。其何為。母曰。雖然。終不潔。寒裳而趨。諸婦挽之力。咸跪請曰。姑老矣。不死終無憂。母熟視良久。賊洶洶迫牆外。給曰。然若志自行之。我當反。諸婦泣且拜。以次挾穉子投井中。母仰天呼曰。吾豈真舍兒輩生邪。躍而入。有婢名秋湄。救不及。亦死之。越日賊去。來鳳兄弟出諸婦及母屍如生。劉及章猶抱一子。未棄也。道旁觀者歎泣。命其井為第一泉。謝令鼎新。易名曰五香。顧令予成。又改稱五烈。勒石以紀其事。見程可則海日堂集

女奴景

澤州陳文貞公。有記女奴景事一篇云。女奴景。贅夫柴乙。皆從予京師。乙病。景輿以歸。及家而乙死。既瘞。景時節哭瘞所。虎銜豕來。熟視景。景哭極哀。不見虎。樵人遙見。呼景。景近虎尺許。虎卒不傷也。其家諸柴。數逼景嫁。不從。朝夕虐酷之。居二年。人或

益不堪。謂當以告吾家。景曰。吾居家久。主不預外人事。吾某氏人。豈以吾事累主邪。諸某愈詞。環伺將奪之。景乘夜再訴之縣。道遇虎當路。景趨過虎旁。虎臥如故。景抵邑門。坐守至天明。門開。趨縣庭號訴。縣令哀其情。召諸某。數而答之。後令行案境中。景遞道訴。又數而答之。愈窘虐愈慘。乃念乙死時。言主家遇我厚。我死終不能報主人恩。甚恨之。景於是提攜其九歲女。六歲男。泣涕匍匐。乞食野宿。走京師。行五閱月而達。計程二千里。中多峻山大水。水潦秋方盛。深及腰腹以上。景凡涉水。則先負一兒抵岸。再返負其一兒。日數涉。涉幾死者數矣。蓋其艱如此。至之日。家人以告。予詢之。言歷歷。感其事。不禁泣下。女奴微者耳。名義所不貴。而能卓然自立。使人感動如此。豈非出於至性者歟。見陳廷敬
午亭集

濮氏女

沈昭子有桐鄉濮氏女。傳曰。余姨母朱。適於濮。其家財萬金。無子。姨悍。夫不敢畜。勝妻。止一女。計以萬金遺女。為擇婿。吳生。吳生貧。置利田宅。予之。給奴婢什物。夫妻美衣食。娛佚遊。如富人居。女獨自念母。以女故。斬濮氏祀。義不忍。從容白母。阿母即百歲後。安能饗異氏一杯羹。且令濮氏世世宗祠不血食乎。母怒罵曰。吾用萬金餉汝。

犬豕猶知人意。況人乎。女於是不敢復言。一日。父過其家。女私語父曰。母之心。父所知也。女為父置簀。帚婢。父時至。令侍巾櫛。生男。存濮氏祀。女死瞑目矣。父喜過望。感且泣。與女約。生男而長。萬金共女中分。女笑不答。歲餘生果男也。女度不可隱載而之母家。會濮氏一二長老。廟見男。具白母。母有子矣。為母賀。母見之大驚。疾怒。次骨不可忍。然已不可奈何。行復自念。女逆我如此。何用逆女為。不若長養此兒。誓不予女一錢。是固女命絕之時也。於是收其田宅奴婢什物。驅就他舍。勿復相見。吳生日窘窮愁苦。鄰里親戚。故所與遊者。皆謂笑之。生憤恚婦。欲刃之。婦度無所容。遂自經以死。見沈府狀
嚴文選

蔡氏

蔡氏。閩漳浦之舊鎮女也。為里人張延祚妻。少有大志。膂力過男子。而延祚亦以勇聞。稱義士云。王師既下閩。濱海數百里。猶多負固。有方祐者。大舉兵。兵經延祚里。延祚與語不合。被殺。氏哀號。日夜不絕。謀於夫之昆弟。欲盡散家財。購死士。為夫報讐。諸昆弟曰。是豈兒女子所能邪。出聲。吾族赤矣。氏不敢復言。撫十數歲孤兒。晝則相抱哭泣。夜磨刀霍霍。仰天踊起。誓必殺祐。一日。聞祐兵宿某地。距其鄉甚近。日夕。帕

首袴靴衣短後衣藏利刀突至祐壘未及數十步反顧見其子踉蹌來愕甚執之耳語曰若安得至此曰思母耳氏頓足自念曰兒幼不可舉事且吾以死決兒脫有不測張氏斬矣遂挈之歸一軍無知者踰月祐悔禍投誠自束縛詣郡縣郡縣官憐而釋之俾復比編戶已而娶於蔡為氏王母女弟氏因得常常見祐每見益恚髮鬢皆反裂然不令祐覺也祐且為甘語市之氏亦曰死者不可復生方君舉兵時肝腦塗地甯獨夫也君縱勿相慰余忘之久矣祐意大安氏則益憤勵齧指出血每當更闌漏下人聲寂然轉展牀第或起立開門左右顧旋入仰臥泣聲喁喁握利刀刺壁壁既穿刀刺猶不已如是以為常踰年為戊子春氏偵祐往從父家大喜陰挈其孤止某地之松林度祐必經此氏椎髻偏髻挾刀以俟日午祐果至雄服怒馬顧盼自如氏突出林中大聲叱祐祐驚遽召其從者從者駭走氏急持刀斫祐墜馬祐負創狂奔氏疾追之行人麕至環而譁氏厲聲曰吾夫為此賊所害妾安可活有助賊者吾與俱死爾雙雪妾當就死於官且言且馳祐攀松枝與鬬中氏額血被面鬬愈銳淚血相迸淋漓往來衝突驚若飛鳥俄而祐被擒氏以左手把其髮右手奮刀搥其胸旋斷其首擲道旁觀者瞋目擣舌不能下氏又揚言於眾曰吾夫為賊所害歲餘日

猶未瞑。必思飲其血。復提其頭。竟奔延祚墓。置頭墓石上。泣告所以殺祐狀。把酒澆墓。凡三行。拜畢。攜幼子。直赴巡按御史臺門。請死。御史霍達異之。欲縱之去。然疑有主者。氏慟哭曰。所以不即死者。為三尺孤耳。今孤且勿顧。容受他人指使邪。幸勿以妾故亂國法。霍默然良久。卒縱之。見陳玉璫
樹峰集

董嫗

董氏者。江都韓文適先生家嫗也。嫗給事韓久。有恩。當乙酉城破時。先生與夫人蕭氏及其長子將就死。夫人痛韓氏之絕也。抱三歲兒哭拜嫗。嫗泣受。裹諸懷。即夜遁。當是時。萬馬屠城。城中火起。照鋒刃如雪。天大雨淙淙。與戈甲聲亂。殺人塞坊市。嫗匍匐蛇行。刀頭馬脚之下。伏死人中。祝兒曰。天不絕韓氏。勿啼。兒果屏息懷中。從城竄出。匿江灘。拾麥穗啖兒。得不死。亂定。投韓之故人高氏。義育之。及長。有成。名魏。字醉白。醉白將婚。嫗病甚。熟視新婦。泣曰。婆子病且死。不及見爾夫婦之好矣。善事爾夫。爾夫昔抱持從萬死中活。有今日。其為人賢且才。雖貧勿憂。後必大。毋效世俗兒女子易爾夫也。婦敬謝之。嫗即沒。年八十有三。見汪懋麟百
尺桐閣集

項淑美

項烈婦諱淑美。瀋安東錦溪里人。適茶坡方希文。希文好學。烈婦獨總家政。年三十。未有子。為希文置一妾。未幾。烈婦生子瑞合。人謂賢婦之報云。丙戌春。濱師駐瀋安。沿江數百里。皆屯兵戍守。所在縱掠。希文攜家避諫村。烈婦念田畝遠廢。無以自給。會親族姨姪皆居西坑山谷險峻。去家近。得以兼綜諸務。遂徙依焉。希文雅好古。圖書萬軸。悉載以往。五月四日。妾子病疹。希文攜瑞合。延醫百家坪。烈婦與一嫗一婢俱。是夕兵驟至。因風縱火。火將及婢。泣挽烈婦衣。欲俱出。烈婦正色曰。出則死於兵。不出死於火。等死耳。死火者不辱。若能死。從我不能。亟去。時嫗已先逸。見火熾甚。復奔入呼曰。火封舍矣。又呼曰。某某已出匿他所矣。皆不應。積書左右坐其中。火焚書燼。烈婦死。見方象瑛健松齋集。

馬烈婦

馬烈婦閩氏。青州安邱人。適同邑馬元成。元成遭瘵疾。烈婦晝夜視藥餌。見其夫痰悶。喉中喀喀作聲。輒豫以手承之。疾可歲餘。咳唾未嘗至地。迨元成病革。損及食飲。烈婦如之。已而日僅進一粥。烈婦如之。屬纊之前。絕水漿者六日。烈婦亦如之。元成竟死。烈婦形神慘淡。有求死之志。家人知之。防閑甚密。欲呼鄰嫗伴寢。婦曰。東家小

姑可與共話。何必攬老人夜眠邪。其意以少女易寢。俟其睡。可自裁也。姑覺。竟以老嫗伴之。又更八日。其姑偶出。為姻家送葬。烈婦取粟。令其弟礮之作糜。復給其舅覓菜市中。反關。向嫗於別室。乃繞出孝堂後。由北扉入。躡棺而上。先以繩自結其頸。後繫椁間。足甫離棺。烈婦死矣。烈婦年十五歸元成。二十七喪夫。後其夫十二日死。時康熙二十五年三月六日。見張貞文集

張有

張氏者。高唐朱母劉孺人侍兒也。名有。鄒平農家子。其父以歲祲乏食。鬻之孺人。時女才十歲。性柔順。孺人絕愛憐之。及長。欲為議婚。女聞色變。詢之。掩淚以對曰。妾幼曾許字某氏。今改適。是渝前盟也。死不敢從。孺人嘉其節。亟覓原壻付之。及得其人。已有妻。子女纍纍矣。以語女。女曰。渠雖別娶。亦須相從。不願更事他人也。婿以兩室非貧家所宜。終不肯。女守義彌堅。孺人益重之。撫若己女。服食居處。不令與僮輩偶。年三十。以疾卒。康熙壬申三月二十一日也。見張貞集

王孝女

王孝女。慈溪王孜之女也。居城之東偏。歲丁巳七月十八日夜二鼓。失火。孝女母卒。

停柩於中堂。孝女處樓上。趨至中堂。疾呼昇柩。無應者。已而火至。孝女伏棺上。不肯去。其父從火光中遙見之。抱之而出。則已死。灌以礬水。稍甦。聲出喉間。僅絲髮。問母棺出否。家人不答。遂哽咽氣絕。時年十五也。先是四月之盡。城中菊花盛開。觀者絡繹。不知其為何祥也。至是而有孝女之事。古來火逼親棺。守死不去者。東漢之蔡順。古初晉之何琦。齊之傅炎。梁之徐普濟。元之余丙。祝公榮。郭通。陳汝楫。明之楊敬祝。大昌。鄧翰。陳倫。然皆幸而得免。其不免者。則宋賈恩。隋李孝子。明唐治始。三人然皆男子。以弱女而殉身者。僅一孝女而已。見黃宗義南雷文約

阮貞孝

貞孝姓阮氏。鳳陽天長人。諸生阮振聲女。許字王博士璠之子道聲。未嫁而道聲死。阮氏年十五。告於父母。服喪。服。驅車詣王之門。登堂拜夫。不哭。拜舅姑。遂留守夫喪。誓不復嫁。其初父母未許。舅姑亦辭。已而知志不可奪。遂從之。既力行婦道。侍姑。費氏疾。至於刲股。姑卒。喪之如禮。始歸甯。舅再娶林氏。阮曰。吾可歸家矣。歸事林如費。林復遭危疾。阮衣不解帶。每夕禱於天。願以身代。林病良已。於是即縣以阮氏貞孝之行。白於巡方御史。上之朝。以待旌。見歸莊恒軒集

嚴烈婦

洞庭東山有嚴烈婦陳氏。年歸未幾而嚴生夭。乳哺孤兒不三載亦不育。於是日夜冀其翁之葬嚴生。凡七年而後葬。烈婦負奩資悉傾於夫之病與喪。女紅自給。未葬即檢諸為人刺繡奩飾者歸之。自製附身服物皆極整辦。葬之三日往奠於墓。哭盡哀。歸而於其夜自經死。見宋用純懷誠集

黃氏

黃氏應山明經黃思閔之女也。少學書。畧通古史。受涂氏長男聘。年十七而涂氏子病且篤。女請命於父。往訣。因袖刀至涂宅。竟日而涂氏死。遂欲自刺。思閔故無子。泣下謂女曰。禮女未嫁則從父。汝父况無子。汝為夫死。如汝父何。女乃止。周身素衣。從容經理。纖悉必謹。然後歸。再請父命。以其妹許余氏次子。期年父死。遺貲可千金。女三分之。以其一治父後事。葬祭皆成禮。其餘分半與妹。而以其半予族弟。立為父後。條理井然。區畫無遺。告家眾曰。某乃今從涂氏子於地下矣。於是擇期歸於涂。初思閔存時。客有為女改嫁地者。言未畢。女即於室中舉刀截指。數指俱斷。客驚走出。故人皆知女志不可奪。至是莫有屈阻者。屆期族黨皆具素冠以喪禮相送。女拜別。更

拜父墳。哭盡哀去。觀者填路。無不泣下。至涂宅。不食七日。死死之前一日。應山令聞而奇之。亟詣涂宅。入室求一見。是時女奄奄垂絕。猶引被覆面。不見邑令。邑令僅見其手。無左指。兀然一掌。歎息良久。為之泣下。涂氏厚殮之。與其長男同穴而封。應山令為勒石紀其事。

見嚴首昇瀨園詩文集

羅氏

羅氏華容。嚴循開之妻也。循開性通敏。喜飾儀容。好學廣交。善滑稽。開口而笑。無虛日。羅氏年十八。歸循開。貌寢而拙。期年生一女。無何。為循開所棄。不入其室者十餘年。羅氏獨與其女共晨夕。拮据米鹽。不啻未亡人。然事舅姑彌謹。奉中饋無闕。每客至。循開未嘗入謀。而杯盤應時具。雖龜鮒同心者。容未逮也。於是循開母及祖母及伯仲母。咸責詈循開。為羅氏不平。久之。循開病。羅氏就侍床側。煮藥進糜。夙夜不稍懈者二百餘日。循開病漸不可起。羅氏私自泣。目盡腫。抱其女屬姑曰。脫有不諱。當以身殉。願姑視此女如子。勿但以為孫也。比循開死。羅氏哭盡哀。兩手掬地。十指冰裂。爪甲殆盡。姑令婢子輩防守。是夜漏盡。同守者倦。縊於棺側。同穴而封。里中人為歌。穀則異室。死則同穴之章。以誄之。頃之。其女亦死。循開竟無後。

見嚴首昇瀨園詩文集